

四庫全書

集部

欽定四庫全書

石田詩選卷九

明 沈周 撰

花竹

草木附

古梅折枝歌

搯蛟不肯居西湖穹窿山中潛作都千年雜與草木處
土膏沁骨蒼皮麤雪中孿拳凍欲死老腊又仗春風穌
今年苦遭斤斧厄左股割落從樵夫幽靈暗泣天亦黑

十斛清淚含明珠抱材肯受爨下辱失勢豈分溝中污
韓相直費百金買何啻網著青珊瑚挑回市上駭衆目
兒女爭看來喧呼還疑神物有變化白日閉戶防逃遁
金繩兩道鎖紐壯禁止更挿碧玉壺主人尚恐莫長守
請我寫作流芳圖高堂雪壁照清影此屋此圖何可無

竹堂寺與李敬敷楊啓同觀梅

竹堂梅花一千樹晴雪塞門無入處秋官黃門兩詩客
珂馬西來為花駐老翁携酒亦偶同花不留人人自住

滿身毛骨沁冰影嚼盡含香各搜句吉祥牡丹清本欠
定惠海棠幽亦未只憑坡口詫繁華似恐同花不同趣
酒酣塗紙作橫斜筆下珠光濕春露只愁此紙捲春去
明日重來花在地

慶雲牡丹

三月十日天半晴慶雲菴裡看春行陶娘李娘俱寂寞
鼠姑照眼真傾城老僧却在色界住靜笑山花惱客情
靚粧倚露粉汗濕醉肉隔紗紅暈明吉祥將落舊有恨

急借紙面圖其生明朝携酒正恐謝亦怕敲門僧厭迎

石軸花

山行見石軸黃榮大而華一花合羣英逕可半尺奢團
團綴末幹兀兀無傍桮或如胷綵踣或如撐秋瓜爛漫
山谷間仙人唾餘霞性不利羊食其生天所賒躑躅本
山榴又以紅見誇且致是非間未暇披金沙誰能別為
名美如洛陽花感茲在隱約把玩令人嗟姿容牡丹比
但未收姚家蓬華困遺賢荆布裏貞娃取酒載酹之下

山西日斜

慶雲菴月下觀杏花

杏花初開紅滿城我眠僧房聞雨聲侵朝急起看晴艷
對房兩株令眼明還宜夜坐了餘興靜免蜂蝶來紛爭
嫣然紅粉本富貴更借月餘添妍清青蘋流水未足擬
金蓮影度雙娉婷庭空月悄花不語但覺風過微香生
老僧看慣不為意却愛小紙燕脂縈高齋素壁可長有
不由零落愁人情

都氏賞花

太平天子弘新治國艷隨年亦爛開心裏紫檀藏密印
朶頭紅玉露重臺酒嫌未劇劇詩賞花怕難齊著鼓催
我與東家同六十白頭能此幾銜盃

九日無菊賞芙蓉

芙蓉九日爛尊前籬脚黃花苦未全素謂及時番落後
本開遲者却當先紅粧風露秋無價白髮年光醉有緣
今許滿頭還亂挿齊山笑口不須偏

妙智菴牡丹

我來借看富貴叢僧房認是賃宅中去年看過今又到
花若遲我含春風氤氳白髮雖不稱未許花前無我儂
慈恩在前妙智後今古樂事將無同古花已見古人醉
今花還對今人紅一觴一咏雅而樂何用羯鼓敲逢逢
冠裳顛倒插花舞強以筋力追兒童莫教錯認白太傅
自是頽然田舍翁

新栽牡丹開遲有作

爛漫東隣醉牡丹也持盃酒待花看却疑有為偏教慢
亦料終開底作難貴介莫遊知地僻美人初聘怯家寒
我無羯鼓相催發祇撚吟髭日凭闌

次全翁雪湖賞梅十二詠

台垣賜老荷君王山上籃輿湖上航如此湖山晝遊地
梅花開遍客還鄉

少在城中多在鄉尋梅猶抵候朝忙新詩似與梅相約
詩到成時梅恰香

不是春愁鶴髮翁風流人物義熙中遙知觴咏清遊處
小筆湖山似欠儂

重巒疊疊水灣灣雪舫尋春醉未還因省玉堂為客夜
如今不似夢中山

綠尊沽酒出春城春日尋梅湖上行聞道衝風又衝雪
旁人不識醉翁情

一代文章百代名鼎司綸閣已忘情近來熟理農桑計
似謫江南作稼卿

湖上尋詩舟去穩
尊前賞雪酒行遲
優游正是居東日
自遣春風人不知

梅撲玉缸春酒開
雪湖山水重徘徊
風流舊屬林君復
人道先生是載來

泛雪吳航勝月槎
深深盃色照銀沙
寒梅鍾得平生愛
重是江南第一花

玉樹瑤山畫裡看
乾坤不似酒壺寬
醉來草聖三千紙
漫使人驚索幼安

清遊不放酒盃空雪共梅花落酒中玉帶朱衣有仙骨
畫船更在水晶宮

黃帽歸舟且莫催雪山留客好銜盃梅花況是堪題咏
今夜春城判不回

賞玉樓春牡丹

白頭盃酒重臨軒喜見名花又一番春粉膩霞微著暈
露紅漸玉淡生痕酷憐似醉還饒笑儘是多情尚欠言
老者相看聊見在遠謀何暇為兒孫

瓶梅

銅瓶倚玉枝，髻几獨看時。
折柳多何惜，臨窓少不宜。
斷根聊活計，勺水小恩私。
省得溪橋外，追尋老步遲。

題牡丹圖

東家牡丹不論葉，西家桑柘不論花。
花前把酒酹紅玉，一滴誰沾桑葉綠。
隔牆羯鼓春逢逢，人散酒闌花亦空。
采桑養蠶百筐滿，子子孫孫衣著暖。
明年賃地過東牆，拔却牡丹多種桑。

看花吟勸陳世則酒

花下一壺酒人與花酬酢樹上百枝花花對人嬋娟昨
日顏色正新鮮今朝少覺不如昨人若無花人不樂花
若無人花寂寞看花不是久遠事人生如花亦難託去
年花下看花人今年已漸隨花落花且開酒且酌催花
鼓板撾芍藥醉他三萬六千觴我與花神作要約

梅花二首

莫嫌踪迹發寒窮南國生涯論首功道體不彰存白貴

心仁有造屬黃中隔烟如夢微微月臨水無言脉脉風
高尚難招我難遠為君頻過小橋東

寂寂疎林滿地苔自知溪逕不容媒沈郎太瘦亦復耳
范叔一寒如此哉漫有心腸竟何與本無顏色不須猜
老夫氣味頗同致歲晚相逢笑口開

東園牡丹為好事者掘去

荒庭粗整石闌干始買花栽得牡丹富貴同心有人愛
繁華移手別家看烟根已撥苔猶破雨坎空存土未漫

笑撫老懷無所惜固知留到子孫難

西園栽花

西園栽花愧老人花枝不似老人身
老身雖被花枝笑自有兒孫看好春

二十日見菊

刺眼新黃見曉枝衆皆爭早獨何遲
晚成霜下真能奈靜寄籬根不自卑
聊補一年秋淡薄追嫌九日事參差
老夫謝酒緣多病醒咏還如落帽時

玉蘭

貞蕩無妖艷，白賁幽除前。
杪枝愛兀贅，叢玉天匠鐫。
清馥揚遠風，標度逸於仙。
我生具素懷，眼謝桃李妍。
指酒通微辭，願言修淨緣。

栽玉蘭

玉蓮小朵天香樹，紫石闌前帶雨栽。
自笑老人無料量，要將年紀待花開。

客遺山柿給為玉蘭戲而賦此

有遺玉蘭栽云花備清馥戒僮植深土殷勤養根玉秋
霜已脫葉挺挺條肄禿識者曰山柿盜名餌公愆舉世
好相欺牖耳多塗目余性易信人指馬不知鹿憑闌祇
發笑罪遺亦何足謂信止豚魚未始及草木

庭前有疎竹

庭前有疎竹楚楚青玉株長身何森疎貫直無曲迂雅
淨合吾志還愛格清癯不似松與栢蓬鬱多髯鬚風起
月作影心耳為之虛十年存保護遠意託笙竽物脆時

莫待蒼黔根葉殊老朽不足截何以承吹噓

薙草行

除草本難盡根子互生成請觀耰鋤後私得雨露情庭
除日夕間衆綠復交盈蘭蕙皆滅迹蕭艾欣得明中為
蚊蚋居蛇蟒亦橫行濕積地道敏氣惡暑熱蒸陷足冒
衣裾賓階苦趨迎每被客嘲諑愛物實沽名不察僮奴
嬾亦柰易發生朝來奮一薙頓令心目清聊快頃臆間
未保終絕萌因以悟小人難去類相縈匪特去云難尚

有怨誰并從茲謝庭草甡甡漫爾榮

青草吟

青草年年多白髮日日少青草催白髮似恐人不老髮
落白有盡草生青不了我是樂天人梳頭對青草

憫禾

薄禾今茲計狼狽尚栖畝借問胡為爾先時已罹咎五
月風雨大潢潦卑莫受田穉俯就沒濁浪扼其首排濯
滴蕩間性命存亦苟天日赫赫出水熱烹羣醜一日色

欽定四庫全書

石田詩集
卷九

已變三日齏在臼我時往撈觀覲活從中剖心存根已
撥欲棄難懈手欲拯卒何及愴食內若疚掘土室滲騰
倩車仰隣佑督肩靡日夜救死豈容久併力役老少足
覲筋亦糾水面青鍼芒稍出九死後氣力與生意委頓
類產婦一一補傷爛行行十八九過時強經營安望如
常茂事多於悔禍始畸終變偶七月尋遭風弱本被拘
揉折處氣當沮虛房但含漪間或見成穗禿耜卧敗簞
何能畢公祖亦莫穀饑口對此發長咨細雨浹昏胷

腹不堪鼓併欲歌止酒

割稻

我家低田水沒肚五男割稻凍慄股勞勞似共雨爭奪
稻芽漸向鎌頭吐蓬蓬纂纂綴青針稻既生芽禾應腐
腐餘割得尚歡喜計利當存十之五小家伶仃止夫婦
稻爛水深無力取口中之食眼中飽忍見穗頭沈著土
波間粒粒付魚雁一年生計空辛苦但憂兩口不聊生
未暇徵租慮官府老翁坐對沈龜哭婆亦號咷向空釜

雲昏月墨忘關門隔壁咆哮一聲虎

白茅顧氏種荔枝成樹有感

人傳顧家園近有閩荔栽始聞漫疎企果否兩莫裁閩
吳地殊懸此物胡來哉彼此氣各偏炎寒亦難諧淮南
不宜橘冀北不宜梅物固產不通性與土相乖耳目自
為仇予懷日徘徊問訊昨走奴已遣仍慮給及返有所
挾么枝葉蓑蓑葉次綴小蕾含黃未曾開事固有變理
執常哂吳歎兼能述所致妄座核偶夢今本已拱把森

然暢條枚去歲實垂成
墮落惜玫瑰根氣恐未充
加培如保孩紫苞已在眼
香甘早流腮老夫喟有此
南氣其北來先從草木見
造化有胚胎厥初限荒服
難與玉食偕漸虞道里近
有以滋味媒置埃當未免
又見飛塵灰

題蕉贈僧

山僧心與迹俱閒
未限居山及出山
長對芭蕉閒不過
時留一偈葉中間

病中折菊為供

憂懷判與菊無私
柰此籬根爛漫枝
彊借陶瓶應秋事
因將病眼洗寒姿
夢中笑口簪花伴
枕上清齋止酒詩
小閣紙簾岑寂地
藥烟零亂鬢絲垂

杏花

半抱春寒薄染煙
一梢斜露曲牆邊
東家小女貪粧裹
聽買新花破曉眠

病起詠菊

試步庭中雨迹晴
籬花黃白似相迎
病腰徙倚秋分瘦

老眼朦朧晚借明
南國金夫空倚富
東家玉女自含貞
一年一度期追慰
今怪山盃欠此情

詠齋中黃菊

宛宛黃金盃
虛器莫挹酒
造化為鼓鑄
賦色應西暎
溥溥朝露浥
宛宛秋苞剖
深翫不盡愛
欲折還惜手
氣屬蕭颯中
遲暮以為候
病夫蕭颯人
意味相昵厚
顧非兒女花
貞固知所負
吾齋空四座
命作歲寒友

草堂前梅桃今春相續試花

春色今年賁古臺東風續續見桃梅攘華莫惜三盃賞
寂寞原非一日培我有好懷隨物遣花於老眼盡情開
人生最似紅芳迹白鬢蕭然感綠苔

七星檜

海虞七星檜宜為羣木冠列生老子宮與邑作奇觀廣
埤氣蕭森入門凜欲汗久信天地成沃知雨露灌傳植
從蕭梁其說我恐漫驗斗形叵全七既斲其半三株實
聊存難執歲月筭各各具一異形容匪詞翰西體裂多

槁豁然散三判東體活亦裂筋骸互續斷北者蜷而禿
袖破舞脫腕葉亦不暇葉榦亦不暇榦左文皮索絢孤
葩頂留繖槎折象齒蹠癭決鬼目爛踰越復叢穴散飢
仍軒岸蛟擎及妮跛努力不得竄矛長及劒短接戰驚
楚漢如此紛怪駭眴君不能按知遭幾雷厄還屢兵火
難生死付冥然造物反被玩君子重貞固頑醜小人譎
緣高坐吹簫我欲呼鶴鶴從根覓埋丹澆泉覲紅燦長
生就其蔭永作娑婆伴

谿樹

雨來谿樹好翡翠散明珠若若萬葉動蕭蕭羣響俱微
風送餘瀝返照妬深濡浩蕩恩波足惟憐爨下枯

吳元玉邀賞牡丹分韻

百朶香雲怕急飛未曾來賞判遲歸臨軒要約從先定
折簡頻煩恐後違藥玉酒船羣客送黃金筵直主人揮
添燈不道成深夜起看紅粧覺露微

塊菴陳太常南軒牡丹

清卿南軒春有光點綴萬綠留紅芳臨軒撩亂難比數
楊家肉屏當面張南都根本元氣壯此花盛得當推王
天於清高補富貴人與草木爭文章春盤厭筋酒飲口
簪纓盍座中飛觴畧無絲竹聒清論澹有風日含新粧
嗟予潦倒似僇父布袍也拂春風香白鷗本是世外物
參鸞附鵠來翱翔兩年歎惜俱作客自家一株烟草荒
平章往事不須較在在有華皆洛陽主人勸客莫辭醉
更言此會非尋常為華置像保長在人間風雨當無傷

生色海棠

粉合胭脂作曉粧，富於顏色各於香。
東風不肯全分付，相對梅華各斷腸。

和陳玉汝大理乞竹韻

僮子才通醉日書，長身早見載專車。
葉留宿雨鶯翎濕，鞭走新泥蠖節舒。
下馬題詩添過客，借風清暑便隣居。
夜來半舫齋中月，壁影蕭蕭水墨虛。

畫梧竹

畫了梧枝又竹枝綠陰如水墨淋漓
信人捲去糊窓壁
雨雨風風總不如

題牡丹

名牌新樣紫牙刊露重烟深正好看
却怪錦雲低亞樹
帶風扶上玉闌干

荷華燕

花供娟娟侑玉卮紅粧文字兩相宜
分香客座須風細
傾蓋林亭要日遲
仙子新開壺裏宅
佳人舊雪手中絲

便應此會同桃李酒政頻教罰後詩

梨花

瑩白姿容謝粉鉛不教酒洗自嬋娟日華暖抱溶溶雪
月影涼生淡淡煙深鎖春愁歸院後靜思曉夢凭闌邊
那堪掃地東風惡抹撥清明又一年

落花五十首

富逞穠華滿樹春香飄辦落樹還貧紅芳旣蛻僊成道
綠葉初陰子養仁偶補燕巢泥薦寵別修蜂蜜水資神

年年為爾添惆悵獨是娥眉未嫁人

飄飄蕩蕩復悠悠樹底追尋到樹頭趙武泥塗知尋雨
秦宮脂粉惜隨流癡情戀酒粘紅袖急急穿簾泊玉鈎
欲拾殘芳擣為藥傷春難療箇中愁

玉勒銀罌已倦遊東飛西落使人愁急挽春去先辭樹
嬾被風扶強上樓魚沫歛恩殘粉在蛛絲牽愛小紅留
色香久在沈迷界懺悔誰能倩比丘

是誰揉碎錦雲堆著地難扶氣力頽懊惱夜生聽雨枕

沈浮朝入送春盃
梢傍小剝鶯還掠
風背差遲鳩又催
瞥眼興亡供一笑
竟因何落竟何開

十二街頭散冶遊
滿街紅紫亂春愁
知時去去留難得
誤色空空念罷休
朝掃尚嫌奴作賤
晚歸還有馬堪憂
何人早起躊躇惜
孤負新粧倚翠樓

夕陽無賴小橋西
春事闌珊意亦迷
錦里門前谿好浣
黃陵廟裏鳥還啼
焚追螺甲教香史
煎帶牛酥囑膳娛
萬寶千鈿真可惜
歸來直欲滿筐攜

一園桃李只須臾
白白朱朱徹樹無
亭怪草玄加舊白
牕嫌點易亂新朱
無方漂泊關遊子
如此衰殘類老夫
來歲重開還自好
小篇聊復記榮枯

供送春愁上客眉
亂紛紛地貯多時
擬招綠妾難成此
戲比紅兒煞要詩
臨水東風撩短鬢
惹空晴日共遊絲
還隨蛺蝶追尋去
墻角公然隱半枝

昨日繁華煥眼新
今朝瞥眼又成陳
深關羊戶無來客
漫藉周亭有醉人
露涕烟淒傷故物
蝸涎蟻迹弔殘春

門牆蹊逕俱寥落丞相知時却不嗔

賣叟藍空雨滿城
麝芳戰艷共縱橫
挽留不住春無力
送去還來風有情
莫論漫山便陸續
仍憐點地亦輕盈
白頭花吏閒頻埽
紅粉佳人緊著驚

斷送韶光入雨聲
羣芳何力與愁爭
鹿銜御苑非佳兆
馬進天閑借美名
時不可為傷薄命
事因無賴到輕生
堪憐堪笑知多少
直得吟翁老費情

東園重過悵徘徊
白亂紅紛似剪裁
昨日不知今日異

開時便有落時催，留連空樹渾無賴。
牽惹閒愁，却悔來固蒂長生信。
三朶又非仙頂，莫栽培。

再四追尋何處邊，石闌干外竹簾前。
青蟲夾墮容相賴，黃鳥兼飛得可憐。
移昨夜燈修故事，剩今朝雨泣餘妍。
摧殘悵感年年慣，將謂今年劇去年。

馬追紅雨倦遊回，春事闌珊意已灰。
生怕漸多頻掃地，酷憐將盡數銜盃。
莽無留戀牆頭過，私有徘徊扇底來。
老去墨牽宜絕物，白頭自笑此心孩。

拋叢脫當亂如攀總借驚膠不可黏梨雪互碍人病酒
絮風撩面妾窺簾千林如約垂垂盡一片相先漸漸添
欲託丹青著遺愛頓無情思筆難拈

處處春光花滿烟忽隨春去使淒然風前敗興休當立
窓下關愁且背眠放怨出宮誰戀主抱香投井死同緣
夕陽寂寞江南北吹滿西興舊渡船

樂遊園裏覓芳菲
莫能全作片飛開日未閒如已謝
見時無幾惜多違
香猶鬱土亡妻葬淚不成粧棄婦歸

正是使人追憶地況來惹鬢復沾衣

花欲延春奈子規聲聲催到綠陰時
遲來杜牧惟逢葉深信秋娘空折枝
悲澣淚邊何忽忽悶低頭處共垂垂
淹留牆脚薦黃甚蝶已無情蛭有私

分香人散只空臺紅粉三千首不回
惡刼信於今日盡凝心疑有別家開
節推繫樹馬知過工部移舟燕蹴來
忍見愁棕敗塗地閉門無語只書灰

風誅雨刮太傷神徙倚詩篇咏斬新
紅淚洩冤啼短命

黃金希術鑄長春
空虛村落今烏有
嘆惜山林迫赤貧
準擬明年大家酒
重看還醉舊遊人

千樹何曾剩半株
芳魂惆悵與時殂
層層疊疊根頭有
寂寂寥寥葉底無
騷亂又當春結局
流亡真要我為圖
超空獨讓沾泥句
著想留懷自覺輸

泊紫漂紅沒住生
傷心那止洛陽城
美人天遠無家別
逐客春深盡族行
汝去安能不思汝
卿輕還復可憐卿
要申遣撥須憑酒
醉裏忘愁且一程

朝來桃李只空園作麼傷殘問不言漁楫再尋非舊路
酒家難認是空村悲歌夜帳虞兮淚醉侮烟江白也魂
知道下場如此惡早先立取厭風旛

繁華消息寄芳叢翫弄遊人轉眼空萬物死生寧離土
一場恩怨本同風株連曉樹成愁綠波及烟江有倖紅
我問老僧求點斷數聲啼鳥夕陽中

筇枝來效小溫存片片猶沾宿雨痕路不分明愁喚夢
酒無聊賴怕臨軒風萍靡靡餘流水烟草萋萋感故園

尚有斷香殘粉在何人剪紙一招魂

供送春愁上客眉暖風晴日黨遊絲擬招綠妾還成些
戲比紅兒煞要詩鈿盒檢粧餘故鬻膽瓶和水棄殘枝
紛爭亂競須臾靜似了東窓一局棋

鬧亂東風又一場出牆桃李苦顛狂不堪小大從子邁
無奈郎當舞更長紐綴莫容鍼線巧糞除徒費帚箕忙
倦遊尚作尋芳夢酒欠敲門惱漫郎

嬋娟殂落不須悲李妹桃娘已有兒人散酒闌春亦去

紅銷綠長物無私文章土苴遭衰劫錦繡閭閻惜賤時
空記少年簪舞處飄零今已鬢如絲

盛時忽忽到衰時一一芳枝變醜枝感舊最關前度客
愴亡休唱後庭詞春如不謝春無度天使長開天亦私
莫怪流連三十咏老夫傷處少人知

憔悴黎明出漢宮新愁都向別離叢青山有地理香質
紅淚何心泣曉風絃管不堪歌舞盡繁華真較綺羅空
天涯春色悲公子玉勒金丸幾處同

百五光陰瞬息中夜來無樹不驚風踏歌女子思楊白
進酒才人賦雨紅金水送香波共渺玉堦看影月俱空
當時深院還重鎖今出墻頭西復東

陣陣紛飛看不真霎時芳樹減精神黃金莫鑄長生帶
紅淚空啼短命春草土苟存流寓迹陌頭終化冶遊塵
大家準備明年酒慚愧重看是老人

擾擾紛紛縱復橫那堪薄薄更輕輕沾泥寥老無狂相
留物坡翁有過名

東坡三咏落梅云
留連一物吾過矣

送雨送春長壽寺

飛來飛去洛陽城莫將風雨埋冤殺造化從來要忌盈
似雨紛然落處晴飄紅泊紫莫聊生美人天遠無家別
逐客春深盡族行去是何因趣忙蝶問難為說假啼鶯
悶思遣撥容酣枕短夢茫茫又不明

春歸莫怪嬾開門及至開門綠滿園漁揖再尋非舊路
酒家難問是空村悲歌夜帳虞兮淚醉侮烟江白也魂
委地於今却惆悵早無人立厭風播

芳華別我漫匆匆已信難留留亦空萬物死生寧離土

一場恩怨本同風
殊連曉樹成愁綠
波及烟江有倖紅
漠漠香魂無點斷
數聲啼鳥夕陽中

筇枝侵曉啄芳痕
借爾庭階亦暫存
路不分明愁喚夢
酒無聊賴怕臨軒
隨風肯去從新嫁
棄樹難留絕故恩
惆悵斷香餘粉在
何人翦紙一招魂

賣叟籃空雨滿城
麝芳戰豔寂無聲
白頭苑吏閒陪掃
紅粉閨人暮著驚
莫論漫山便窟俗
還憐點地亦輕盈
亂紛紛處無憑據
一局殘碁不算贏

十分顏色儘堪誇只奈風情不戀家慣把無常玩成敗

別因容易惜繁華兩姬先殞傷吳隊

孫武斬吳王二隊長

千艷叢

埋怨漢斜消遣一枝閒柱杖小池新錦看跳蛙

香車寶馬少追陪紅白紛紛又一迴昨日不知今日異

開時便有落時催只從箇裏觀生滅再轉年頭証去來

老子與渠忘未得殘紅收入掌中盃

玉蕊霞苞六附全一時分散合無緣風前敗興休當立

窓下關愁且背眠田氏義亡同五百

田橫死五百義士皆投海而死

唐

宮怨放及三千無人相喚江南北吹滿西興舊渡船
落柄開權既屬春少容遲緩亦誰嗔酷憎好事敗塗地
若被閒愁殢殺人細數只堪滋眼纈仰吹時欲墮頭巾
不應捫虱窮簷者薦坐公然有錦茵

錦粧林館綉池臺徹底從頭今在哉斷酒不堪詩並廢
嬾遊祇把病相推節推繫樹馬驚去工部移舟燕蹴來
爛漫愁踪何地著謝承惟有一庭苔

打失園林富與榮羣芳力莫與時爭將春託命春何在

恃色傾城色早傾物不可長知墮幻勢因無賴到輕生
閒窓戲把丹青筆描寫人間懊惱情

千林紅褪已如摯一片初飛漸漸添梨雪
冱堦人病酒絮風撩面妾窺簾併傷鳥起餘芳盡
汎愛鰥爭晚浪粘可奈去年生滅相今年公案又重拈

昨日才聞叫子規又看青子綠陰時秋娘勸早今方信
杜牧來時已較遲脫當不歸魂冉冉濺枝空有淚垂垂
淹留墻角媽黃甚暴殄芳非罪阿誰

芳樹清尊興已闌拋堦滾地又成團帶烟窓扇櫺斜透
夾雨簷溝瓦半漫老衲目皮閒作觀小娃裙衩戲承歡
無端打破繁華夢擁被傷春卧不安

樂遊園裏眼俱空只在今朝事不同錯道海棠依舊日
生憎棟子下稍風巧人鏝上泥柔粉柔婦筐中綠映紅
便認未開如已謝一般情况寂寥中

為爾徘徊何處邊赤闌干外碧簷前亂飛萬點紅無度
閒過一鶯黃可憐觀裏又來劉禹錫江南重見李龜年

送春把酒追無及留取銀燈補後緣

東風刮刮劇情吹萬玉園林子不遺席捲橫收西楚貨
國亡空愴後庭詞拂紅回去思前度搔白看來惜少時
莫怪留連五十咏老夫傷處少人知

岳王墳上樹

岳王墳上樹武侯廟前柏在墳生南枝在廟根如石不
訶無翦伐不朽非培植冥冥草木者何以通人德二公
鬱忠義天地為拍塞天地無發付一夜化兩植風雲發

長噫雷雨作怒擊一不忘北兵一不忘曹賊英靈尚凜
凜死有幹生力其生雖不辰其死有遺直嗟哉背逆徒
未死氣先息諳諳蔑蘄餘苟有亦荆棘

掛蘭

厚土賦草木去土曷恃生貞叢縣孤莖由天匪培成願
學無根槎不作糞壤英令人仰高潔絕地自欣榮矯矯
凌空仙碧帶侑紫瓊誰能褻佩纓靈纍空復情德馨不
可挹負含風露清君子務超世淺俗訕釣名區區荆棘

輩下視莽縱橫

墻下野菊

墻根野菊自爛漫
新黃瑣碎無人憐
幽芳不揚抱隱德
僻地蕭條宜養賢
聊因盃酒少慰藉
三嗅三歎秋風前

道上春草

春草本無愁
有愁因我生
千里隨我遠
始自出門行
一步長一苗
根從心上紫
酒澆根不爛
詩遣苗復榮
何如閉門坐
愁草兩忘情

南山有高樹

南山有高樹衆鳥投其枝樹莫有號召鳥集各如期密
雨謝沾濕赫日與蔽虧構架亦宜巢哺育久于茲一旦
疾風作根柢不能持衆鳥蔑依恃分飛更他之他之復
高樹罔念舊息時老夫感樹鳥再三誦附離

石湖書院老樹

范公亭東看古樹有身莫可限尺度只憑長大不長長
邊老婪酣遺醜肚一榦朽盡皮肉空一榦輪囷葉麓蔽

盤根到處走虬蛇風雨不驚知得地坐根納蔭且移時
靜玩氣機成感寓人生安得如此頑不死不用常在世

王理之君子林

王子愛竹迺祖風个个對屋居城中居然便號君子林
以多為稱少未通方其樹藝心廣大十个便與千个同
小人固多君子少聚此十輩道足充願言取直取虛已
取節不改固爾窮王子復能手寫竹筆下夭矯看游龍
洛陽家貌司馬片紙未見容荆公請常事此勿改業

桃李何足塗春紅

蔣菊

合瓦團團縛小盆
烟叢分蔣遶秋軒
先教辯葉方知種
更慮澆泉太漬根
寒送餘甘歸藥籠
晚投薄分與柴門
開花解向天涯笑
遊子何時憶故園

山茶辭

惟茲古株以孤立
兮墀上敏樹根器
固謚兮燧如渥若
枝葉孔翕兮奕綠
團欒朱榮爛兮歲
寒雪霰芳斯發兮

衆植搖落保子子兮顧彼華滋哀然襲衣兮君子有常
小人中非兮外鎮內貞羌有此淑行兮材倨不振知受
命兮物曲尚利工弗然兮絲棄而完遂生樂天兮敬以
為圖賢足友予兮山空無人聊與爾居兮

雪蕉

王維偶寫雪中蕉一種清寒尚未消前度風流思舊觀
後人影響見新標殘黃潦倒漫詩跡破綠離披折扇杓
今日蒙翁同鹿夢曉窓呵筆費辭招

詠庭前桂

庭前有芳桂聳立自孤生時當風露淒
顧發黃金榮翹處羣植閑悠悠揚德馨衆穢豈不忌
氣稟莫相能

鳥獸

感燕

爾燕何巧點作巢違故常懸贅兩梢間憑虛絕依傍何
膏幕上危不託枿與余他壘皆有據負固恃安藏爾尚
務速成致敗無忖量銜泥互雌雄一日千迴翔塗塗苦

相附疏漬易剥瓢頃暫二墮落力勞業荒唐背吻苦啄
唆累日不成亡衆壘既舉雛飛鳴能頡頏見善不悛改
愚營故倭倭大拙類蝨蝨小智逞蜣螂恤爾殆有為示
險在堂皇凡是肯構者鑒求道則昌拓之平易基衛之
仁義墻順之勿改作緩之勿率忙允作堅久計子孫有
餘慶物異理則協情激申蕪章

新燕

今年見新燕猶似去年見主人頭髮白轉多只有烏衣

不曾變年去年來來不差分明記得主人家柴門大開
風滿屋飛出飛入隨楊花君不見相國門前車馬塞一
朝去相車馬寂車馬寂草萋萋燕子還來梁上栖

題鶯

賣詩賣酒醉春城破盡青衫白髮生四海固無知我者
錯教啼殺樹頭鶯

縱禽

秦雲越樹路悠悠鎖掣金籠百怨休中有能言綠衣鳥

還呼萬歲一回頭

鬪雞

兩勢當場備縱擒自家勇敢果誰臨勝時固有昂然氣
挫者都無礪乃心毛錦紛披泥迹污冠英潦倒血痕深
老夫罷與人爭席戲倚閒窓看鬪禽

對鶯與薛堯卿聯句

鴝鵒來前除兀立照日影舒翼輝明翎周引吭延修頸

啁啾類嘒藻睥睨憶窺杏

先生嘗為賀氏作杏花鶯故云章憲

馴蔑比隣

惱逸靡淮塽警定額高贅疣周頰領低垂癭廣掌跣何

壯寬胆食莫哽章蹒跚步徐徐蹀躞舞挺挺慙義面發

熱周笑殺齒欲冷持遺意彌厚出哇志亦併章容貎甚

閒暇標格極秀整氣肩羞脂肥周鶴骨輸瘦瘠老饕思

屬厭大嚼知雋永章汙邪歲苦墊蓁汝媿千頃周

西山有虎行

西山人家傍山住唱歌采茶上去下山日落仍唱歌
路黑林深無虎慮今年虎多令人憂遶山搏人茶不收

墻東小女膏血流村南老翁空羈縻官司射虎差弓手
自隱山家索鷄酒明朝入城去報官虎畏相公今避走

又

西山有虎動成羣小兒夜啼爭撞門衆中最猛說白額
當晝磨牙當道蹲腥風衝人行不得行人出門便愁食
青天白日奈爾何老夫却愁陰類多

虎來

成化十一年九月謠言虎至爭慌惚我謂虎至豈水鄉

况少蕩翳與林樾前村漸報啞老翁西村少年撲見骨
未昏家家柵猪犬四隣緩急莫相越昨聞隣子說果見
夜聞噉哮竦毛髮起從壁孔稍窺覘恰有微月映屋缺
翻烏駭雀不安樹偃草落葉悲風發閣行卓尾自破來
意搏不得怒氣勃聳軀哆吻首闖地瞋目眈眈兩盃凸
侵朝出門迹宛在濕泥載途五爪沒口中且言尚驚怕
轉首四顧疑衝突嗚呼猛獸猛不知平郊獨行無乃忽
人稠地局勢無比衆眼不甘留突兀其中豈無馮婦者

攘臂敢前何不覺彎弧倘有裴將軍老命須臾應弦歿
不如徙惡南山深安我民心汝安窟

杏花燕子

杏花初破處新燕正來時紅雨裡飛去烏衣濕不知

送歸燕

送歸燕送歸燕秋社今年又一遍明年春社是來時隔
不半年仍復見送歸燕送歸燕似把人家作郵傳來時
不是慕富貴去日曾非棄貧賤口喃喃尾涎涎意與主

人相眷戀對語殷勤楊柳樓雙飛再四梧桐院樓中院
中有賓客主人日日開高宴酒杯去手易肺肝酒杯在
手草顏面若將燕子比人情燕子年年情不變

絡緯

絡緯復絡緯辛勤鳴露蟲音聲作能事終久不成功

食煙

海戶求鮮食填筐管族繁炊泥深詣窟緣殼暗尋門摘
玉容生槌凝酥怯過燔著薑相打合漬酒與溫存角簪

蠻娃髻纒纏扯婦魂味饗人口腹菑累爾兒孫比類憐
吹吻含津憶吐吞庭霜委故蛻沙雨沒虛痕薦爽山盃
後休將螭蛤論

題鳳圖

真鳳眼未見丹青徒假威千年希世出九仞自天飛堂
上忽屏幃人間空是非良工勿輕易五色慎毛衣

玉泉觀魚

石池本清冽映日更明透畜魚不得藏巨細百尾湊在

水若空遊一一見肥瘦又若在鏡中鱗鬣無差謬旅往
還旅來人餽口即就洋洋得其所何如浴沂秀深契濠
上觀肯襲如蒙陋心賞失歸途昏雲黯孤岫

器用

王將軍樓船歌

江南古來傳綺語江南畫船如屋裡將軍總衛在江北
百乘高車馬千里五牙富貴地非宜雲海行窩出新理
揚川駛駝十大蓮飛艣擘空如逆矢兩頭簫鼓沸中流

兩岸行人看如市中間紗幕開暑風左邊設圖右邊史
將軍受用通南北坐泛西湖與杭比還須笑咏載老夫
收取風流追郭李

製駿披巾一首

苦暑欲露頂不謹見客惡輕巾思緝駿求工適良俶沈
慮揆之久載難遜未熟豈以庶帽擬角屋系有幅重謂
高士飭方作手三沐引縷鍼肖梭轉指往來續一轉一
成締玲瓏萬目屬勻勻布烟華眇眇絢霧縠工云費心

思微酒不能贖積功月尚半使我百鷗覆著之若無巾
了了頂顱禿塵漏風颭入涼得敬亦足珍收戒童奴常
畏爪濡觸未效郭漫墊敢就陶褻漉傍詫長仙標孤坐
映修竹

陸翁贈簫杖

一筇紫竹歲寒條十節中通亦當簫使我弄秋唇有賴
累翁歸夜手無聊星含古竅聲猶滑霞漬長莖色未消
老甚出遊今得力坐吹明月廣陵橋

覽鏡辭

匣中青銅小圓月比月長明又不缺朝朝照我六十年
初自壯時今白髮一朝見面一朝親老少妍媸認得真
病來半月不開匣開匣頓然成別人脂膠兩眼匡失肉
頤褶垂垂顴骨簇傍人雖道言笑是箇裏故吾何可贖
鏡神謂我瘦勿驚爾形尚在天有情休文減帶固本相
撫鏡始覺吾心平

烏藤杖謠

烏皮襍積竹約然瘦骨挺玉修且堅
流求怪藤老不死
翦送海外誰黃綠
洪濤躍過十萬里
滑似龍鬣疑沾涎
憊翁杖之尚溜手
扶持頗認兒孫賢
傍人笑為數促節
百有二十期
吾年明朝策雪入梅去
桃竹不敢爭其權

石田詩選卷九

欽定四庫全書

石田詩選卷十

明 沈周 撰

咏物

喻席

組織文章七尺身
庚庚烟縷碧管新
放開儘自有安地
卷動如何又信人
舍者相爭昧容德
管生因割墮偏塵
只隨野老高眠穩
紙帳藜牀且任貧

雕牙杖頭歌

象齒截玉三寸強刻劃老彭精不爽垂手偻背顧頂光
笑顏半破脣吻張墜胃有乳長兩囊握之久矣溜而黃
杖頭兀置類竿戲較彼井觀殊失常蔣生贈我意則良
假其久視祝壽昌一步一舉無敢忘與銓相生八百霜
登山臨水吾何妨

燈花

小草引炎莖來依三尺檠芳菲媚長夜煨燼剝孤榮煤

在容占喜書臨借發明自家膏馥在渾不藉春生

綿花

蘼含紫附簇雪蘊碧鈴深小草存衣被長人誰此心

咏簾

誰放春雲下曲瓊一重薄隔萬重情珠光蕩日春如夢
瑣影通風笑有聲外面令人倍惆悵裡邊容眼自分明
知無緣分難輕入敢與楊花燕子爭

混堂

混堂鳴板日初紅懷垢人人向此中君子欲修除被事
小夫翻習裸程風未能潔已嗟先亂亦復隨波惜衆同
慚德應多汗難濯不容便論水無功

魚簋

經烟緯雨碧玲瓏碌碌微軀逐釣翁蝦蟹有緘容括納
鯢鯨無計可牢籠初心未許蔑心得不佞何慚祝姓同
骨格自知君子器一時落賺小為功

石鼎

惟爾宜烹我服從渾然玉斲謝金鎔廣唇咄嚙寧無合
枵腹彭亨自有容味在何妨人染指餽存還媿母尸饗
老夫飽飯需茶次笑看其間水火攻

白燕和袁海潛韻

素姿驚眼舊全非百姓尋常識者稀向月似看雙練去
開簾疑放一鵬歸知食雪液通僊骨解剪霓綃作舞衣
定是阿嬌釵上玉卻來金屋化雙飛

螢火

閃閃熒熒無定居隨風星散滿郊墟空名何補昏黃際
末照聊承腐爛餘陰類濫明如火冷小流乘隙怪窓虛
自憐老眼模糊甚縱著囊盛已廢書

人影

身外觀身託我成我初生日汝同生謂無亦有終無實
假有如無強有名夜壁漫隨燈慘淡曉窓偏屬鏡分明
算來惟與鰥夫稱老去猶堪作伴行

破焦

翻手青青覆手黃也隨人事作炎涼
臨闌默默低頭月
滿眼蕭蕭敗興霜
舞袖郎當官妓老
田衣顛倒醉僧狂
明年看受春風寵
醉墨重題展賀章

楊花二首

撲面吹衣雪點晴
亂紛紛地亞夫營
借風為力終無賴
與水何緣却託生
看雀啁金新藥破
愛蜂撩玉小團輕
踏謔女子空連臂
喚不歸來信薄情

恃何顏色漫狂顛
雖取花名未敢憐
寒士衣裳思挾纊

相公簾幕欲漫天吹噓不起春泥上撩亂無端老鬢邊
一種當門小兒子傍風因日弄輕圓

詠磨

盤盤軋軋更重重功用宜人天下從兩象合來分動靜
一心存處得中庸兼收瑣屑才無棄不擇龕梁德有容
莫道頑身老難運運時還解饗千鍾

詠芋頭餅

榮萌方長折作餌糲相仍香劑圓從範青膏軟出蒸女

工虛鄭縞士宴奪唐綾我有傷生感臨餐獨不勝

送門神

抱關憔悴兩疲兵衆欲麾之我漫榮檢爾功名惟故紙
傍誰門戶有長情戟悲雨迹銷殘畫鏊賴蟲絲戀絕纓
莫向新郎訴恩怨明年今夜自分明

詠錢五首

箇許微軀萬事任似泉流動利源深平章市物無偏價
泛濫兒童有愛心一飽莫充輸白粟五財同用愧黃金

可憐別號為賕賂多少英雄就此沈

區區團團銅作胎能貧能富亦神哉有堪使鬼原非謬
無任呼兄亦不來總爾苞苴莫漫臭終然撲滿要遭搥
寒儒也辦生涯地四壁春苔綠萬枚

輕形薄質具陰陽之足能行乏翅翔聚散本由冥數定
有無何著老夫忙一緡牽愁人人逐四字編年代代詳
昨日賣文留短陌免教愚虜誚空囊

存亡未了復亡存慾火難燒此利根生化有涯真子母

圓方為象小乾坤指揮悉聽何須耳患難能排豈藉言
自笑白頭窮措大不妨明月夜開門

三老雖誇濟世才亦能為福亦為災舉枚慧眼觀窮達
具片虛心攝去來數減至三無足陌銖輕惟五尚稱財
祇除義士并廉吏萬貫填門不易開

大樗

材氣俱偏性亦偏偶乘雨露覺喬然參天無象鸞鳳遠
借日為陰燕雀便只好沉溝終作斷不應當路久妨賢

蹶之可有曾非楮且把功名付爨煙

盆水映日圓影上簷可愛而賦

盆漪陽采合晶熒圓見簷牙倒影明剛就一圈包太極
類從六觀究無生照來虛室心光現印入空梁月相成
且信茅茨藏白壁尚期知者論連城

雪鶴

何年白鶴遼東去雪影翩翩喚不歸少保畫圖殘粉在
令威城郭故人非瑤臺夜色迷丹頂珠樹春寒失綈衣

塵海別來三萬日碧雲迢遞憶高飛

雜咏

書牀屏

譬筭一百年三萬六千日人莫筭其夜數亦與日一日
夜循大環吾身處環中日作夜以息補作在息功致息
乃有牀有牀息有位休休一奠枕夢見無懷氏

長安桃李花

長安桃李花下有萬人行人人各有役一人牽一情孜

致彼因利汲汲此為名相逢不相通飛塵暗春城白日
夜還曉青春歡復榮黑髮倏皓首絕迹迨無生

少年吟

氣血駕少年作事躁鮮謀任情每敗度惘惘無省修歲
月自推移礱世若一磨與人礱氣血和平始寡過人智
發多歷禽性馴久籠甫及造就時乃知歲月功

枕頭曲

少女重青鬢膏掠不停手臨鏡時再三呼人問妍醜西

家有寡妻日日待白首

門前有垂楊

門前有垂楊枝葉何靡靡
飄花欲及地忽復因風起
搖蕩少婦心天涯念遊子
愁多肌肉消不敢臨流水

風吹枝上花

風吹枝上花嫣然發春紅
吹落忽在地利害同一風
妾初託君愛謂妾如花容
容在愛先弛不能保其終
妾願化為金亦願化為石
堅久保君心貞固保君德
百年在

恩愛莫以妾顏色

暗紡詞

貧家紡婦夜紡紗無油點火暗搖車紡多手熟不勞力
眼雖不見手明白車搖搖今夜迢迢今夜不作無明朝
來圖織布且換米早粥在鍋渾舍喜富家燒蠟滿堂紅
彈絲調竹喧春風紡車嘈嘈只隔壁苦樂兩聲何不同

虞虜歌

折虞虜搯伏雌是妾與君相別時鳳為魚桂為炊君方

宴樂妾正悲百里奚知不知

昭君怨和沈工侍韻

分入深宮無出時
單于今日見蛾眉
干戈信仗蛾眉息
甘讓他人買畫師

仕女圖

鮫薄窓虛日映樓
杏花風蕩玉簾鉤
手擎粧盒偷微笑
紅蜘蛛絲在上頭

棄婦吟

白頭吟後我重吟海水何如我恨深外面笙歌裏邊淚
一家恩怨兩人心雙鴛沙暖春全透孤雁霜寒月半沈
毀却鸞釵休認火不知長舌解銷金

思遠

露下芳草歇寒氣薄重幃幽處心獨驚行念君子衣君
子別既久嗣音亦已稀愁來不成織空對流黃機揮淚
如泉水明燭無光輝

有所思

人生何以悲悲在生別離音塵無通日相見當時夜
風吹林柯誤君來庭墀達旦耿未寐因之有所思

薄命妾

婦人原附人以貌結君子願言百年內相生復相死宛
宛梁間燕雙雙同一壘一朝顧新歡分飛別離此新歡
如新花比妾真可憐君本不棄妾自無長少年

盒子會辭

有序

南京舊院有色業俱優者或二十三十姓結

為手帕姊妹每上節以春藥巧具骰核相賽
名盒子會凡得奇品為勝輸者罰酒酌勝者
中有所私亦來挾金助會厭厭夜飲彌月而
止席間設燈張樂各出其技能賦此以識京
城樂事也

平樂燈宵鬧如沸燈火烘春笑聲內盒奩來往闌芳鄰
手帕綢繆通姊妹東家西家百絡盛粧骰釘核春滿藥
豹胎間挾鯉冰脆烏攬分攬柳玉生不論多同較奇有

品裏輸無例陪酒呈絲逞竹會心歡
襖鈔裨金走情友
閑堂一月自春風酒香人語百花中
一般桃李三千戶
亦有愁人隔牆住

鄉有富子費盡至行乞賦此以戒暴殄不守先業者

蒼毛盧面走趑趄破練秋風裹凍鷄
今日泥塗眼前事
少年謠舞夢中人口餐未卜墻無祭
戶稅猶存柘已薪
寄與富兒休暴殄儉如良藥可醫貧

迎新送舊曲

鼉鼓擊龍笛吹阿婆接寶新人來新人來舊人去迎新
送舊門前路門前路有曲直門前樹有短長傍人未說
新人彊新人繡羅鬱金香舊人練布秋風凉初將生死
託末路受盡糟糠還下堂下堂畏踏來時路啼鳥飛花
撩斷腸鳥啼怪道呼姑惡花飛怪道似郎狂寄語新人
保恩愛三年五年當見郎

棄婦辭

棄婦下堂去六親盡彷徨棄婦無所棄棄之家不祥憶

初來嫁時惟家以為慶

叶

捐捐理亂絲為君事流黃札

札把長線為君補衣裳雖勞不敢辭雖工不敢揚竭力

奉君歡羣小亦莫容

叶

君心豈不諒背憎由舌長黃金

亦銷鑠禮義安足防去去出君門落日照大荒輻脫難

復行絃絕難更張事乖理當去但念未分明

叶

割皮以

為紙瀝血以為漿前書柏舟篇後書綠衣章進君期為

悟視聽付茫茫復書於太空願助日月光萬古麗元氣

上下流無方倘或淪君心他時省糟糠

王明妃

妾顏美如花正可事和親宮中勝花者留為君側人君
王欲偃武賤妾豈惜身揚揚雙蛾眉萬里掃胡塵將軍
嘆白髮翹首空麒麟功當賞畫師重在畫不真

諷久客

宛丘擊鼓滯歸人酒盞花枝日日新千里鹽資方責楚
十年繒筭未收秦關臨落月鷄催夢路逆西風馬避塵

鄉信悠悠不堪寄深閨愁絕雁聲春

北邙行

北邙山下哭聲苦洛陽城中涕歌舞昨日歌舞城中人
今日淒涼山下土山下土無今古白狐寒嘯鵠體烟青
燐夜灼蓬科雨英雄異代不知名高封大樹如掌平喪
車轉轉日不絕後人來葬前人穴後來葬者還更多可
憐歌舞何日歇

長干行

與郎同在長干住自小相逢不相忌郎騎竹馬到儂家
當著爹娘與郎戲不道如今却嫁郎葡萄錦被合懽牀
處郎不久郎作客去年五月下三湘三湘一去無消息
蛺蝶雙飛烟草碧春夢依稀蘭渚東覺來愁殺石尤風

將進酒

君不見人生百年駒過隙何況人生不滿百又不見來
世不可待往世不可追百年三萬六千日日日爛醉君
何辭天公那得私人物頭上不可掃白髮所以知章眼

落井底花太白手捉江中月金蓮畫炬飛碧烟趙女起
舞蹈四筵主人勸客連夜飲似恐明朝非少年新豐酒
槽滴紅露十千一斗亦有數為君典卻紫綺裘不惜更
脫珊瑚鈎門前楊花如水流入來愁人風滿樓將進酒
開君愁

煮石歌

君不見太山之磷可液飲符陵之砂可粒食天與道人
作芻豢故有五母及八石雲根初截如截肪大拳小拳

皆饌糧湘以玄水漬天漿火中三伏芙蓉香青山落庖
厨謫星泣鍋釜道人饑腹如漏天五色一補齊天年道
人之術許我傳我為道人開石田

三五七言

君不來來何時三年一書札萬里獨相思瑤芳滿把憑
誰寄明月傷情只自知

樹下獨坐

梳嬾只被髮逍遙惟任真清朝坐茂樹好鳥鳴芳春樂

意偶關物天機難語人將詩欲描寫腐爛不能神

過都廷襄新居

春曉春郊作伴行新居新酒故人迎
弱雲妬日雨作意細柳偃牆風與情
田畷分歧來宅遠漁濂合水逼厨清
閉門教子無他事市不聞喧書有聲

自慰辭

有序

余躋於老境涉憂歷患日弗能堪乃為辭歌
以自慰命為自慰辭復繪清逸之圖系書之

揭壁間對之則悠然之懷頓然而生不自知其溺世慮中也

念曜輪之迅邁若駕余而同馳省孩提之猶昨尋衰醜之冒斯憫微生之有限樂何少而多悲喪亡疾疾沓憂虞之藁已奚氣血之堪持世汶汶而曷超時冉冉而莫追事往往而草變不常理薈薈而吉凶難必吉自吝而變凶凶自悔而化吉禍福循環得得失失惟吾人者迨老無少迨死無還不如草木之有消息獨優得於一氣之

間準亭毒之無私何偏頗於義而錮頑紛不齊之不可以度絜又玩壽夭而倒跖顏無乃匿智窅冥使人不得窺其姦已乎哉擣廣可以開隘發笑可以破患引壺觴以抒懷寄嘯咏於高閒或跂石而孤坐或振策以清般鳥飛鳴而滕余盼芳條之可攀悠然臨水暢然登山信造物之逆順更惘惘而長嘆

人影

愛欲揮杯勸其情有倡隨無違起居地尚保死生期明

月成三處清波化百時冥然通契誼曾莫假言辭

詠醉翁牀

酒後要息嬾假牀其製新安排醉鄉具康濟老夫身兼
坐尚似倚半眠尤可人山公不解此倒載馬蹄塵

石田詩選卷十

石田詩選跋

夫詩志之形於聲者也志與辭兼至而後可以言詩矣
志未至焉則不足以駕御其言辭辭未至焉則不足以
抒寫其志意楚騷尚矣唐杜子美所以凌駕百氏者其
志則愛君其辭則忠告志與辭俱至也後世詩人學杜
者不少不立其志而徒攻其辭吾未見其能杜也石田
先生逸民也古之逸民如易所謂不事王侯高尚其志
而先生則不然身在田野乃心罔不在廟堂雖曰遯世

無悶而憂時憫俗之志未嘗去諸方寸也耳之所聞目之所見凡有感於中則必動於志而形於辭故其為杜不必篇做句儼而杜固在也以是先生之詩一出而騷人詞客袖手拱服矣光祿署丞華公汝德尚古而石丈暇日取先生之詩拔其尤者門分類別合古今諸作得若干首共為十卷題曰石田詩選繡梓以傳以鈇嘗辱知於先生俾贅言於卷尾嗟夫先生之詩辭志兼得固無可去取焉者殆若襲裘然光祿公之所選者皆孤之

腋雉之頭而羔羊之皮不足為罕矣而愚也尚欲以狗
尾續之邪弘治甲子十月慈谿後學張鈇書



